

मार्निंग डोगरी न्यूज़ बुलेटिन, सभें. 09-20 Hrs

<><><><><><>

Headlines

- प्रधानमंत्री नरेन्द्र मोदी होर अज्ज नमीं दिल्ली च ग्रामीण भारत दे सशक्तिकरण पर केन्द्रित ग्रामीण भारत महोत्सव 2025 दा उद्घाटन करगंन।
- रेल मंत्रालय बक्खरी जम्मू रेलवे डिवीजन कायम करने जा'रदा ऐ। 6 जनवरी गी प्रधानमंत्री होर एहदा वर्चुअल ढंगै नै उद्घाटन करगंन।
- उपमुख्यमंत्री सुरिन्दर चौधरी होरें आखेआ ऐ जे विकास पैहलकदमिएं दी असरदार अमलावरी लेई योजना ते तकनीक दा तालमेल बड़ा लाजमी ऐ।
- मंत्री सतीश शर्मा होरें सयाले लेई खुराक, सार्वजनिक बंड बिक्री ते ट्रांसपोर्ट मैहकमे दिएं तैआरिएं ते प्रबंधें दी समीक्षा कीती।
- मौसम विभाग नै अगले दऊं दिनें लेई यैलो अलर्ट जारी कीता, अज्जै कोला 6 जनवरी तगर भारी बर्फबारी ते बरखा दे आसार न।

<><><><><><>

PM Grameen Bharat

प्रधानमंत्री नरेन्द्र मोदी होर अज्ज नमीं दिल्ली च ग्रामीण भारत महोत्सव 2025 दा उद्घाटन करडन ते इस मौके पर ओह किट्ट अगगे भाषण बी देडन। आकाशवाणी संवाददाता दी रिपोर्ट मूजब, इस महोत्सव दा मकसद ग्रामीण ढांचे च बाददा करना, आत्मनिर्भर इकाइयां कायम करना ते ग्रामीण समुदायें अंदर नमिएं काह्डें आहली प्रवृत्ति गी बढ़ावा देना ऐ। 6एं दिनें दे इस महोत्सव दा विशे—सार ऐ 'विकसित भारत बनाने लेई इक मजबूत ग्रामीण भारत दा निर्माण'। इस कार्यक्रम दा उद्देश्य उद्यम—कारखानादारी दे राहें ग्रामीण महिलाएं गी सशक्त बनाना ऐ। इस दरान पूर्वोत्तर दे राज्यें बक्खी चेचे तौर पर ध्यान केन्द्रित कीता जाहग।

<><><><><><>

Jammu Rly Division

रेल मंत्रालय आसेआ फिरोजपुर डिविजन दा परतियै गठन करियै उत्तर रेलवे जोन तैह्त इक नमां रेलवे डिविजन कायम कीता जाहग जेहदा सदर दफ्तर जम्मू च होग। आकाशवाणी दे जम्मू संवाददाता नै जानकारी

दिक्ती ऐ जे मंत्रालय आसेआ उत्तर रेलवे गी पैहली जनवरी 2025 गी आधिकारिक तौर पर दिक्ती गेदी जानकारी च आखेआ गेआ ऐ जे जम्मू डिविजन लेई 5 सैक्शनां प्रस्तावित कीतियां गेइयां न। जिंदे च पठानकोट-जम्मू-उधमपुर, श्रीनगर-बारामूला, भोगपुर सिरवाल-पठानकोट, बटाला-पठानकोट ते पठानकोट-जोगिंदर नगर आहलियां सैक्शनां शामिल न। तोआई, कल 5 जनवरी गी श्रीनगर थमां जम्मू लेई इक विशेष निरीक्षण रेलगड्डी चलाई जाह्ग जेडी खित्ते दे रेल सरबंधी विकास च इक संगेमील साबित होग। आकाशवाणी जम्मू दे संवाददाता दी रिपोर्ट मूजब प्रधानमंत्री नरेंद्र मोदी होर 6 जनवरी गी वीडियो कांफ्रेंसिंग राहें जम्मू रेलवे डिविजन दी स्थापना दी घोषणा करडन। इस कार्यक्रम च उपराज्यपाल मनोज सिन्हा होर ते मुख्यमंत्री ओमर अब्दुल्ला बी शामिल होडन। 5 जनवरी गी केंद्री रेल मंत्री होर श्रीनगर रेलवे स्टेशन ते कश्मीर रेल परियोजना दी उधमपुर-श्रीनगर-बारामूला रेल लिंक सेक्शन दा निरीक्षण करडन। एहदे अलावा रेलवे सुरक्षा दे कमिशनर दिनेश चंद देशवाल होर 7 ते 8 जनवरी गी कश्मीर रेल परियोजनां दे रियासी कटड़ा सैक्शन दा निरीक्षण करडन।

<><><><><><>

Dy CM

नीतियां बनाने आहलें ते तकनीकी माहिरें बश्कार तगड़े सरबंधें दे महत्व पर लोऽ पांदे होई उपमुख्यमंत्री सुरिंदर चौधरी होरें आखेआ ऐ जे सेवाएं दी बेहतरीन ढंगै नै दस्तयाबी ते विकास-बाददे आहली पैहलकदमिं दी असरदार ढंगै सिर अमल-आवरी लेई एह अत्त लाजमी ऐ। उपमुख्यमंत्री होरें एह गल्ल कल शालटेंग च मकैनिकल इंजीनियरिंग डिवीजन दे दौरे दरान अधिकारिं-कर्मचारिं कन्नै गल्लबात करै करदे हे। इस मौके पर उनें बर्फ हटाने आहले सूबाई नियंत्रण कक्ष दे कम्मकाज दा जायजा बी लैता।

<><><><><><>

Itoo Review Meeting

सेहत ते मेडिकल शिक्षा मंत्री सकीना इत्तू होरें अनंतनाग, कुलगाम ते शोपियां जिलें च सेहत ते मेडिकल शिक्षा मैहकमे दे कम्मकाज दा आकलन करने लेई खन्नाबल च कल इक जायजा बैठक लाई। मंत्री होरें गी बक्ख-बक्ख योजनाएं तैहत तोढ चाढ़े जा करदे प्रोजेक्टें दी स्थिति बारै जानकारी दिक्ती गेई ते कन्नै इब्बी दस्सेआ गेआ जे मते सारे निर्माण कम्म पूरी चाल्ली बवस्थित ढंगै कन्नै चलै करदे न ते इ'नें सब्बनें गी बेल्ले सिर सबूरा करी लैता जाह्ग। अधिकारिं गी संबोधित करदे होई इत्तू होरें कम्मं दी रफ्तार च तेजी आह्णने दे निर्देश जारी कीते।

<><><><><><>

CS-Surya Ghar

मुख्य सचिव अटल डुल्लु होरें जम्मू-कश्मीर च पीएम सूर्य घर मुफ्त बिजली योजना दे तैहत्त घरें दिएं छत्तें पर सूरज दी तपश कन्नै चलने आहले सौर उर्जा पैनल लाने दे कम्मै च हासल प्रगति दा जायजा लैने आस्तै कल इक बैठक लाई। इस मौके पर मुख्य सचिव होरें सरबंघत मैह्कमें पर जोर पाया जे ओह इस योजना बारै मते शा मते लोकें गी जागरूक बनान ते एह्दे लेई मुकामी भाशाएं च प्रचार करने ते ताले गेदे उपभोक्ताएं गी इस सरबंघे च मुकामी भाशाएं च एसएमएस भेजने दी जरूरतै पर बी जोर पाया गेआ। मुख्य सचिव होरें केन्द्र शासित प्रदेश दे सब्बनें जिलें च तकरीबन 30 ज्हार सौर उर्जा संयंत्र स्थापित करने दा लक्ष्य हासल करने लेई सरबंघत कारपोरेशनें गी हुकम रसाल कीता। उनें इब्बी आखेआ जे जिच्चर एह लक्ष्य हासल नेई करी लैता जंदा उच्चर इस योजना बारै पूरी सरगर्मी कन्नै लोकें गी जागरूक बनाने दा कम्म तोढ चाढ़ेया जा।

<><><><><><>

Digital Data

केंद्र सरकार नै डिजिटल व्यक्तिगत डेटा संरक्षण नियम 2025 दा मसौदा जारी करी दित्ता ऐ। इलेक्ट्रॉनिक्स ते सूचना टेक्नोलाजी मंत्री अश्विनी वैष्णव होरें सोशल मीडिया पर इक पोस्ट राहें इसी सांझा करदे होई आखेआ ऐ जे मसौदा नियम, सलाह-मशवरे लेई खुले न। उनें बारै च लोकें गी अपने विचार व्यक्त करने लेई बी आखेआ। डिजिटल व्यक्तिगत डेटा संरक्षण कनून 2023 गी राष्ट्रपति द्रौपदी मुर्मु होरें अगस्त 2023 च मंजूरी दित्ती ही। मसौदा नियमें च डिजिटल व्यक्तिगत डेटा संरक्षण कनून 2023 दे तैहत्त व्यक्तिगत सैह्मति लैने, डेटा प्रसंस्करण निकायें ते अधिकारियें दे कम्मकार कन्नै जुडे दे प्रावधान कीते गे न। मसौदा नियमें मूजब डेटा प्रसंस्करण कन्नै जुड़े दा व्यक्ति, कंपनी जां संगठन कुसै बच्चे दा व्यक्तिगत डेटा लैने थमां पैहले ओह्दे अभिभावकें दी सैह्मति हासल करने लेई उचित तकनीकी ते संस्थागत उपाऽ लागू करना जकीनी बनाव। मसौदा नियमें पर अपने विचार माई गोव पोर्टल दे राहें 18 फरवरी तगर सांझे कीते जाई सकदे न।

<><><><><><>

Tpt. Minister

ट्रांसपोर्ट, खुराक, सार्वजनिक बंड बिक्री ते उपभोक्ता मामले सरबंघी मंत्री सतीश शर्मा होरें कल अपने मतैहत्त मैह्कमे दे कम्में काजै दी समीक्षा करने लेई बक्ख-बक्ख बैठकां लाइयां। इस दरान उनें सयाले दरान राशन दी सप्लाई ते होर दुइएं जरूरी चीजें दी दस्तयाबी जकीनी बनाने लेई कीते गेदे प्रबंधें दा जायजा लैता। उनें मैह्कमा ट्रांसपोर्ट दे कम्में दी समीक्षा कीती ते सरबंघत अफसरें गी आखेआ जे गडिडएं दे रख-रखाव, ट्रांसपोर्ट सेवा टकोहदा करियै दूर दरेड़े इलाकें च ते ढंगै सिर कराया वसूली बारे बी पूरी संजीदगी कन्नै कम्म कीता जा। सिविल सचिवालय श्रीनगर च गै केई शिष्टमंडलें बी मंत्री हुंदे नै मिलियै अपनिएं दिक्कतें, शकैतें ते मंगें गी उंदे अग्गे रखेआ। जिनेंगी धरोइयै सुनने परैत मंत्री होरें उंदे तौले ते पैहल दी बिनाह पर नबेड़े दा जकीन दोआया।

<><><><><><>

India Protest

विदेश मंत्रालय नै आखेआ ऐ जे भारत नै चीन गी एह जकीनी बनाने दा आग्रह कीता जे बृहमपुत्र नदी दे हेठले क्षेत्र दे राज्य दे हितें गी इस दरेया दे उप्परले इलाके दी गतिविधिएं कन्नै कोई नुक्सान नेई होए। थारलंग सैंगपो नदी पर पनबिजली परियोजना दे सरबंधे च इक सुआल दा परता दिंदे होई मंत्रालय दे प्रवक्ता रणधीर जयसवाल होरें आखेआ जे भारत नै माहिराना स्तर पर ते राजनियिक माध्यमें कन्नै अपने इलाके च पदिएं पर बना'रदी बड्डी परियोजनाएं गी लेइयै चीन कन्नै अपनी चिंताएं ते विचार गी लगातार सांझा कीता। उनें आखेआ जे सरकार तक्क रखना जारी रखगते भारत दे हितें दी राक्खी लेई महत्वपूर्ण गैह् पुट्टग। इक होर सुआले दा परता दिंदे होई प्रवक्ता होरें आखेआ जे चीन दे होतान विभाग च 2 नमीं काउंटी दी स्थापना बारे घोशणा बारे ओह अवगत न। इनें तथकथित काउंटी दे अधिकार क्षेत्र दा किश हिस्सा केन्द्र शासत प्रदेश लद्दाख च औंदा ऐ। जयसवाल होरें आखेआ जे भारत नै इस क्षेत्र दे भारतीय इलाके च अवैध चीनी अधिकार गी कदे बी स्वीकार नेई कीता ऐ।

<><><><><><>

NIC

एनएसएस दा अपनी किस्मै दा पैह्ला पैह्ला राष्ट्रीय एकता कैंप-2025 जेह्दे च शड़ियां महिला स्वयं सेवी हिस्सा लै करदियां हियां, कल जम्मू दे गांधी नगर स्थित पदमश्री पदमा सचदेव महिला कालेज च आयोजित कीता गेआ। उच्च शिक्षा मैहकमे दे बैनर हेठ आयोजित इस विशेष कैंप दा विषयसार हा "महिला सशक्तिकरण ते सुतंत्रता" जैहड़ा नारी शक्ति ते एह्दे महत्व पर केन्द्रित हा। उच्च शिक्षा विभाग दे अतिरिक्त मुख्क सचिव शांतमपु होरें इस कैंप दा उद्घाटन कीता जेह्दा सरिस्ता महिला कालेज परेड, महिला कालेज गांधी नगर ते एनएसएस आस्सेआ सांझे तौरा पर कीता गेआ। इस प्रोग्राम च 25 एनएसएस प्रोग्राम अफसरें, 18 टीमें ते एनएसएस दे 200 स्वयंसेविएं हिस्सा लैता।

<><><><><><>

Kushtwar Inspection

थक़्तवाड़ दे मैहकमा माल दे एसिस्टेंट कमीशनर निभर्य शर्मा, बीडीओ किशतवाड़ संजीव कोतवाल ते पीएचई ते जीआरएफएफ दे अधिकारिएं कल राष्ट्रीय जरनैली सड़कै पर कुलीद चौक कोला लेइयै सेक्टर 5 तगर सड़कै दी स्थिति दी सांझे तौरा पर निरीक्षण कीता। टीम नै सड़कै पर औने आलिएं दिक्कतें, सरबंधत ढांचे ते पानी दे निकास सरबन्धी बवस्थाएं दा जायजा लैता। इस दरान मैहकमा बिजली विकास, ग्रामीण विकास, पीएचई ते ग्रेफ दे अधिकारिएं गी निर्देश दित्ता जे उंदे मैहकमे हेठ पौंदिएं, उजागर कीती गेदिएं सब्बने दिक्कतें गी दूर

करने दा निर्देश दित्ता तां जे सड़कै पर गड़िङएं दी आओजाई च कुसै चाल्ली दी कोई दिक्कत परेशानी पेश नेई आवै।

<><><><><><>

Weather

मौसम विभाग नै जम्मू-कश्मीर च 5 ते 6 जनवरी लेई मौसम सरबंधी येलो-अलर्ट आहली चेतावनी जारी करदे होई आखेआ ऐ जे इस दरान बक्ख-बक्ख थाहें पर भारी बरखा ते बर्फबारी होई सकदी ऐ। आकाशवाणी दे जम्मू संवाददाता मूजब, स्थानी मौसम विभाग दी चेतावनी च प्रदेश दे केई हिस्सें च भारी बरखा बरने ते बर्फबारी दे असार दस्से गे न। जंदे रोज जम्मू शैहर ते एहदे कन्नै लगदे केई सारे इलाकें च धुंध ते कोहरा छाए दा रेया जेहदे चलदे एह असार जताए जा करदे न जम्मू च अज्ज जां कल बरखा बरी सकदी ऐ। इस अवधि दरान, उच्चिएं धारें पर बर्फू दे ल्हास-तोदे पौने ते मुख सिड़कें पर गड़िएं दी आओजाई प्रभावित होने दी शैका बी जताई गई ऐ। तोआई, ऐतिहासिक मुगल रोड जेड़ी पुंछ ते राजौरी जिले गी कश्मीर दे शोपियां जिले कन्नै जोड़दी ऐ ओह गड़िएं दी आओजाई लेई अजें बी बंद ऐ। आकाशवाणी संवाददाता दी रिपोर्ट मूजब मुगल रोड दे केई सारे हिस्सें पर तलैहट होने करी इस शिड़कै पर गड़िएं दी आओजाई बंद ऐ।

<><><><><><>